

գործակատարները գաղտնի կերպով գրգռում էին մեզ հայերի դեմ... Բայց մենք այնքան միամիտ եղանք, որ չհասկացանք, որ դրանով մեր կործանումն են նախապատրաստում...

– Հիմա նոյնը չե՞ն անում, հիմա ձեզ չե՞ն գրգռում հայերի դեմ...

– Գրգռում են, եւ աւելի վատ կերպով... Բայց մեր յիմար ազնուականները չեն հասկանում: Չեն հասկանում եւ մեր հոգեւորականները: Օրինակի համար, կարելի է լած լինէք, որ մեզանից ոչ այնքան հեռու, Արտոսի ստորոտներում, կենում է մեծ շէխը: Նա աստծոյ սուրբ մարդն է, ես շատ մեղք արած կը լինեմ, եթէ այդ մասին ամենափոքր կասկած ունենամ, բայց կրթոտ մարդ է: Գիտե՞ք, որքա՛ն անգամ նրան գրգռել են հայերի դեմ... Որքա՛ն անգամ նա ոչնչացրել է հայոց ամբողջ գաւառներ... Եւ բոլոր քրդերը լսում են նրա ձայնը եւ խոնարհուում են նրա հրամանին: Բաւական է նրան՝ մի առաւօտ վերկենալ ու ասել, թէ մարգարէն երազում հրամայեց բոլոր գաւուրներին կոտորել: Իսկոյն քրդերը կառնեն իրանց զէնքերը եւ կը հետեւեն նրան: Եթէ «գուշակողը չլինէր, նա շատ վատ բաներ կաներ...

– Ո՞վ է այդ «գուշակողը», – հարցրեց Ասլանը, որպէս թէ չէ ճանաչում:

– Ասում են՝ Արաբիայի կողմերիցն է, մարգարէի հայրենիքից: Բոլորովին սուրբ մարդ է. ամէն բան գիտէ. ինչ-որ հարցնէք, նա կասէ ձեզ: Մինչեւ անգամ շէխը, որ մեծ իմաստութիւն ունի, շատ բաներ նրանից է հարցնում:

– Ուրեմն, դուք գոհ չե՞ք օսմանցիներից:

– Ի՞նչ ունենք գոհ լինելու: Նրանք եկան, մեր տան մեջ երկպառակութիւն ձգեցին. մեզ թշնամացրին ոչ միայն մեր դրացի հայերի հետ, այլ թշնամացրին քուրդը քրդի հետ: Այժմ չէք գտնի մի ցեղ, որ մի այլ ցեղի հետ հաշտ լինի: Եղբայրը եղբոր միսն է ուտում: Բայց այդպէս չէր առաջ. սեր կար, միաբանութիւն կար, ամէն մարդ իր չափը ճանաչում էր, փոքրը գիտէր մեծի պատիւը, իսկ մեծը գիտէր փոքրին հոգ տանել: Այժմ ամէն բան փոխուել է: Այն մարդը, որ երէկ իմ ախոռատան մեջ ծառայ էր, իմ ձիաների աղբն էր մաքրում, այսօր իրան մուղիի, գայմազամ, փաշայ է կոչում, եւ ես պէտք է գնամ նրան գլուխ վեր բերեմ: Աւելի լաւ չե՞ր լինի, որ ես այդ գլուխը գերեզման տանեի, քան թէ անպատուի. ..

Բայց մի բան չպէտք է ուրանայ, որ օսմանցին գալուց յետոյ երկիրը բաւական խաղաղացաւ:

– Ինչպե՞ր խաղաղացաւ. աւելի վատթարացաւ: Առաջ մենք մեր երկրի տերն էինք եւ գիտէինք մեր տան բանը, ճանաչում էինք՝ ո՞վ է լաւը, ո՞վ է վատը, եւ եթէ մէկը մի չար գործ էր կատարում, իսկոյն իմանում էինք, եւ յանցա-